



**REPUBLIKA E SHQIPËRISË**  
**KOMISIONERI PËR MBROJTJEN NGA DISKRIMINIMI**

Nr. 852 Prot.

Tiranë, më 31 . 05 . 2024

**V E N D I M**

Nr. 164 , Datë 31 . 05 . 2024

Bazuar në pikën 11<sup>1</sup>, të nenit 33, të ligjit 10221/2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi<sup>2</sup>,

**K O N S T A T O N:**

Mbështetur në nenin 32, pika 1, shkronja “a”, dhe pika 3 e këtij neni, si dhe nenit 33 e 33/1, të ligjit 10221/2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi, ka ndjekur të gjithë hapat që parashikon procedura e hetimit administrativ, për shqyrtimin e ankesës nr. 159 Regj., datë 21.08.2023, paraqitur nga shtetasja Davë Demir Begu, kundër Drejtorisë Vendore Shkodër, të Agjencisë Shtetërore të Kadastrës, me pretendimin e diskriminimit për shkak të “racës<sup>3</sup>”.

---

<sup>1</sup> “Nëse Komisioneri urdhëron rregullime ose masa, personi kundër të cilit është paraqitur ankesa, raporton brenda 30 ditëve para Komisionerit në lidhje me veprimet e ndërmarra për zbatimin e vendimit. Në rast se personi, kundër të cilit është paraqitur ankesa nuk e informon Komisionerin ose nuk e zbaton vendimin, Komisioneri vendos masë për ndëshkimin me gjobë për personin kundër të cilit është paraqitur ankesa. Sanksioni me gjobë shfuqizohet nëse personi kundër të cilit është paraqitur ankesa, e zbaton vendimin brenda shtatë ditëve pasi është vendosur sanksioni”.

<sup>2</sup> Në vijim do t’i referohemi si Komisioneri ose me akronimin KMD.

<sup>3</sup> Ankuesja vetëdeklarohet se i përket pakicës kombëtare egjiptiane.

Bazuar nenin 33/10, të ligjit nr. 10221/2010 “Për Mbrojtjen nga Diskriminimi”, të ndryshuar, në përfundim të procedurës së hetimit administrativ, Komisioneri ka dalë me Vendimin nr. 48, datë 14.02.2024, me anë të të cilit ka vendosur:

*“1. Konstatimin e diskriminimit në formën e diskriminimit strukturor, të subjektit ankues, Dave Begu, për shkak të racës, si pjesë e pakicës kombëtare egjiptiane, në fushën e të mirave dhe shërbimeve, nga ana e DV ASHK Shkodër, lidhur me mosshqyrtimin e kërkesës së saj për legalizim të banesës.”*

Në pikën 2, të këtij Vendimi, Komisioneri ka vendosur:

*“2. Të merren masa nga DV ASHK Shkodër, për shqyrtimin e kërkesës, aplikimit me nr. 1190 prot., datë 20.11.2017, të subjektit ankues Davë Begu, për legalizim banese.”*

Rezulton e provuar nga lajmërim marrja e shërbimit postar se, DV ASHK Shkodër ka marrë dijeni për vendimin sipërcituar.

Në nenin 33/11, të ligjit nr. 10221/2010 “Per Mbrojtjen nga Diskriminimi”, të ndryshuar, parashikohet se: *“Nëse Komisioneri urdhëron rregullime ose masa, personi kundër të cilit është paraqitur ankesa, raporton brenda 30 ditëve para Komisionerit në lidhje me veprimet e ndërmarra për zbatimin e vendimit. Në rast se personi, kundër të cilit është paraqitur ankesa nuk e informon Komisionerin ose nuk e zbaton vendimin, Komisioneri vendos masë për ndëshkimin me gjobë për personin kundër të cilit është paraqitur ankesa. Sanksioni me gjobë shfuqizohet nëse personi kundër të cilit është paraqitur ankesa, e zbaton vendimin brenda shtatë ditëve pasi është vendosur sanksioni”.*

Për sa më sipër, nëpërmjet shkresës me nr. 628 prot., datë 23.04.2024, Komisioneri i është drejtuar sërish DV ASHK Shkodër, duke i sjellë në vëmendje, se brenda dhjetë ditëve nga marrja dijeni e kësaj shkrese, ka detyrimin të zbatojë Vendimin nr. 48, datë 14.02.2024, të KMD-së, si dhe i ka kërkuar të informojë KMD, lidhur me masat konkrete të marra për zbatimin e këtij vendimi.

Pavarësisht marrjes dijeni për sa më sipër, Komisionerit nuk i është dërguar asnjë përgjigje shkresore lidhur me masat që institucioni i DV ASHK Shkodër duhet të ndërmerre për zbatimin e vendimit të mësipërm të KMD-së.

Komisioneri çmon se, DV ASHK Shkodër, si subjekt i cili është gjetur përgjegjës për sjelljen diskriminuese, jo vetëm që nuk e ka informuar Komisionerin brenda afateve ligjore të parashikuara nga neni 33, pika 11, të LMD, por nuk rezulton të ketë marrë masa konkrete për të zbatuar vendimin e Komisionerit.

Në këtë mënyrë, DV ASHK Shkodër, nuk ka përmbushur detyrimin ligjor të parashikuar nga neni 32, pika 11, të ligjit nr. 10221/2010 “Për Mbrojtjen nga Diskriminimi”, të ndryshuar.

Ky mosveprim, kjo mospërbushje e këtij detyrimi ligjor, në bazë të nenit 33, pika 13, të ligjit të sipërpërmendur shoqërohet me marrjen e masave administrative, gjobë. Për personat juridik, siç është në rastin konkret DV ASHK Shkodër, ky nen përcakton shkrehimisht: “Çdo person që shkel dispozitat e këtij ligji dënohet me gjobë si më poshtë”:..... b) personi juridik nga 60.000 deri në 600.000 lekë;.....”

Për sa më sipër, Komisioneri për Mbrojtjen nga Diskriminimi arrin në konkluzionin se, DV ASHK Shkodër, është në shkelje të detyrimit ligjor të përcaktuar në nenin 33, pika 11, të ligjit nr. 10221/2010 “Për Mbrojtjen nga Diskriminimi”, të ndryshuar, shkelje e cila sipas nenit 33, pika 13, të po këtij ligji, është e dënueshme me gjobë.

Në lidhje me masën e gjobës, Komisioneri mban në konsideratë parashikimet dhe kriteret e vendosura në nenin 33, pika 12, të LMD, ku sanksionohet se: “12. Kur vendos masën, Komisioneri siguron që ajo të jetë: a) e efektshme dhe parandaluese; dhe b) në përpjesëtim me gjendjen që e shkaktoi vendosjen e masës. Nëse vendoset gjobë, Komisioneri përcakton shumën e gjobës duke marrë parasysh: i) natyrën dhe fushën e veprimit të shkeljes dhe ndikimin mbi viktimën; dhe ii) rrethanat personale e financiare të shkelësit, veçanërisht duke marrë në konsideratë të gjitha burimet e të ardhurave dhe nëse shkelja kryhet nga një person juridik privat, merren parasysh aktivet e bilancit dhe fitimi, si dhe pagat totale të paguara punonjësve; c) nëse e njëjta shkelje diskriminon disa persona, vendoset vetëm një gjobë, por duke marrë parasysh kërkesat e shkronjës “b” të këtij neni.”

Duke mbajtur në konsideratë kriteret e mësipërme për përcaktimin e masës së gjobës, si dhe bazuar në faktin që, shkelja e konstatuar prek një person të pakicës kombëtare egjiptiane, që është pjesë e një grupi shoqëror vulnerabël, si dhe të formës së diskriminimit, Komisioneri, arrin në përfundimin se, DV ASHK Shkodër, duhet të gjobitet me 300 000 (treqind mijë) lekë, për moszbatimin e Vendimit nr. 48, datë 14.02.2024, të KMD-së.

### **PËR KËTO ARSYE:**

Mbështetur në nenin 32/1, shkronja “ç”, neni 33, pikat 11, 12, 13/a dhe 14, si dhe nenin 33/1, të ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar,

Komisioneri për Mbrojtjen nga Diskriminimi,

### **V E N D O S I:**

1. Subjekti i Drejtorisë Vendore Shkodër, të Agjencisë Shtetërore të Kadastrës, (DV ASHK Shkodër), të gjobitet në vlerën 300.000 (treqind mijë) lekë.

2. Gjoba të ekzekutohet dhe të derdhet në Buxhetin e Shtetit jo më vonë se 45 (dyzet e pesë) ditë nga komunikimi i këtij vendimi. Me kalimin e këtij afati, vendimi i dhënë shndërrohet në titull ekzekutiv dhe ekzekutohet në mënyrë të detyrueshme nga zyra e përmbarimit, me kërkesë të Komisionerit.
3. Pagesa e vlerës së gjobës të bëhet pranë çdo banke në llogarinë e thesarit Tiranë, për llogari të: Komisioneri për Mbrojtjen nga Diskriminimi, NIPT: L02027451K, Kodi: 1091001, Entiteti i Qeverisjes: 1, Distrikti (TDO), Llogaria ekonomike: 7115499.
4. Zbatimi i Vendimit nr. 48, datë 14.02.2024, të Komisionerit për Mbrojtjen nga Diskriminimi, brenda shtatë ditëve nga marrja dijani për sanksionet, sjell shfuqizimin e tij.
5. Kundër këtij vendimi lejohet ankimi në gjykatë, brenda 45 ditëve nga marrja dijani, sipas parashikimeve ligjore të Kodit të Procedurave Administrative, të ndryshuar.

**KOMISIONERI**

**Robert GAJDA**